

## 妄想

Ta<sup>n</sup> 哈拿心內恬恬求，只有嘴唇振動，無聽 tiòh 聲，所以，以利掠做她是 teh 酒醉。（《全民台語聖經》撒母耳上卷 1：13）

我 ê 成長期有一個妄想：讀大學。我 ê 老父 tùi 我細漢 ê 時 tòh kā chit-ê 慾望灌入去我 ê 腦內。直到 hit 時，老父 ê 厝裡無人 bat 讀完高中，大學 koh khah 免講。老父有讀完十年級，tī hit 時算是有受過好 ê 教育，m̄-koh，伊對我有 koh khah koân ê 寄望，而且我有承諾 beh 達成 chit-ê 目標。這是 tī 大蕭條 ê 期間，所以，籌備學費是一個大問題。

Tī hit 時，美國 kan-ta<sup>n</sup> 有兩間免費 ê 大學：西點軍校(West Point) kah tī 安納波利斯 ê 美國海軍學院 (The United States Naval Academy in Annapolis)；我選擇後者。Tī 我六歲 ê 時，若有人問我人生 ê 目標是啥物，我會親像一隻鸚哥重複講：「我 beh 去安納波利斯讀冊。」Tī 我高中 ê 早期，我差不多 ē-tàng 暗念海軍學院 ê 入學目錄，he 致使我有小 khóa 擔心。親像講，新學生 bē-sái 有鴨母蹄，所以我就用幾 nā 點鐘來檢查我 ê 腳底，koh 用我的腳底來來回回 liàn 一個可口可樂 ê 罐 á，來加強我腳底 ê 拱(kông)形。「尿保留(urine retention)」是另外一個會喪失資格 ê 規定，我 m̄知影 he 是啥物意思，m̄-koh，它 hō 我煩惱。我恐驚我最後去到海軍學院，結果醫生講：「阮真失禮，總是，你必須 tng 去平原鎮，因為你有保留一 koá 你 ê 尿。」

哈拿，一個古早 ê 以色列人，她 mā 有一個妄想：她渴望一個 kián<sup>n</sup>。她真 chē 年無 kián<sup>n</sup>，而且絕望，她最後去到上主 ê 殿，對上帝喉叫，koh 咒 chōa 若是她 ē-tàng 有一個 kián<sup>n</sup>，她 beh kā 伊獻 hō 上帝。上帝回應她 ê 祈禱，hō 她生撒母耳。哈拿遵守她 ê 誓言，hō 撒母耳 tòh tī 上主 ê 殿，kah 以利大祭司做伙服事。

妄想有可能是健康 ê á 是無健康 ê，m̄-koh，咱所做 ê lóng 有牽涉 tiòh 上帝，tòh ē-tàng 確保咱 ê 慾望是適當 ê，然後偉大 ê tai-chì tòh 會發生。

**祈禱：**上主 ah，祢 ê 話 kā 阮講，阮心內 ê 慾望，祢 beh 歡喜 hō 阮，所以求祢 hō 渴望接近祢成做我 ê 基本慾望。求祢 hō 我所有 ê 妄想 lóng 符合祢 ê 旨意，koh 求祢幫助我，hō 我盡可能完全沉浸 tī 我 kah 耶穌基督—我所疼 ê 救主不斷 ê 交流中。我靠祂 ê 名祈禱。阿們。

(2003.12.07)